

2-8-5
5
卷首序文例目山圖

卷一本迹門

卷二形勝門

卷三靈異門

卷四檀施門

卷五梵剎門

普陀洛迦新志

第一冊 德厚題卷

普陀洛迦新志卷六

古會稽陶

鏞鑑定

古翁山王亨彥輯

禪德門第六

海英嶽靈爰誕開士。德馨行勝。斯號上人。非有大德之住持。奚副高山之仰止。茲山則清了南渡。海絕漁舟。懷信西歸。夢通帝座。古鼎之舍利光照。潮音之德業芳流。大曉以閃電明心。賢良能呪水愈疾。中贊感魚籃入夢。別庵有龍衛投懷。半偈受持。紫柏得死生無礙。三年禪觀。妙峯知淨穢一如。見紅披法服而行。相偕蓮侶。嗣銑脫臭囊而去。一句彌陀。薪傳一脈。喜衣鉢之相承。海會四河。慶箕裘之克紹。志禪德。

此門分四。一普濟住持。二法雨住持。三本山出家四十方寄寓。

一普濟住持 共五十五傳

五代梁

慧鏐日本僧。五代梁貞明二年。從五臺山得觀音像。將還本國。舟觸新螺礁。蓮花當洋。舟蔽不前。鏐禱曰。使我國衆生無緣見佛。當從所向。建立精藍。有頃。舟行竟止。潮音洞下。居民張氏。目覩斯異。亟舍所居。雙峯山。築庵奉之。呼爲不肯去觀音院。斯爲普陀開創奉佛之始。故鏐爲開山第一代。清通旭贊其像曰。親從五臺來。欲向日本去。普門名號徧十方。何必繪像圖歸計。忽然舟不行。菩薩應無住。聽其止而休。此貨已成滯。一山名勝待師開。天下羣瞻兩足地。裘志古蹟門。秦許二志靈異。

宋

真歇名清了。

清一作青

蜀之雍氏子。生有慧根。眉目疎秀。神宇靜深。見佛則欣戀不捨。年

十一。依聖果寺俊僧受業。又七歲試法華經得度。具戒聽講。立解經論。以爲言說終非究竟。出峽抵沔漢。扣丹霞淳和尚。淳問。如何是空劫時自己。歇擬對。淳掌之。遂契旨。翌日淳上堂曰。日照孤峯翠。月臨溪水寒。祖師玄妙訣。莫向寸心安。歇趨進曰。今日瞞某甲不得也。曰。試舉看。歇良久。淳曰。將謂爾瞥地。歇便出。輒北遊五

臺京汴南抵儀徵。謁長蘆祖照。紹興元年辛亥。自長蘆南遊。浮海至普陀。結庵山椒。扁曰海岸孤絕處。禪林英秀多依之。郡請於朝。易律爲禪。時海山七百餘家。俱業漁。一聞教音。俱棄舟去。日活千萬億命。後主國清。雪峯育王。龍翔興慶。雙徑。凡七處說法。五承紫泥之詔。得度弟子四百。嗣法者三十餘人。有語錄二集若干卷。行世。塔在無畏石。普陀禪宗自歇始。爲開宗第一代。由是飛錫此山者。皆具曹溪正法眼藏。

舊志大德志。

按宏宗闡戒二者爲佛門大綱。悟道爲禪。守道爲戒。學佛者不由持戒而欲得定慧。亦猶吾儒舍身體力行而欲得薪傳。若戒不清淨。則禪何由悟。故宏法者持戒與參禪並重。明釋傳燈輯天台方外志。於僧德門分聖僧考。如宋德韶。濟顛諸人是。祖師考。如龍樹尊者。智者大師諸人是。高僧考。教則有慧命眞清諸人。禪則有遺則眞歇諸人。蓮則有南嶽智者諸大師。普陀以眞歇爲開宗第一代。其爲禪宗乎。然眞歇嘗謂淨土一法。直接上上根器。傍引中下之流。又謂乃

佛乃祖。在教在禪。皆修淨土。同歸一源。知其禪淨雙修。卽漸卽頓。與高語明心見性。超凡入聖。不務事修。以期實證者。實天淵懸殊也。

自得。名慧暉。會稽張氏子。自少得度。於澄照寺道凝。年二十。孤錫雲遊。見長蘆真歇。以爲有所證。於閃電機下。竟南歸。後謁天童宏智覺。徹法源底。許爲室中眞子。紹興丁巳。開法普陀。徙萬壽。及吉祥。雪竇。淳熙三年。勅主淨慈。上堂。朔風凜凜。掃寒林。落葉歸根。露赤心。萬派朝宗。船到岸。六窗虛映。芥投鍼。本成現。莫他尋。性地閒閒。耀古今。戶外凍消。春色動。四山渾作木龍吟。又云。谷之神。樞之要。裏許旁參。回途得妙。雲雖動而常閒。月雖晦而彌照。賓主交參。正偏兼到。十洲春盡。花凋殘。珊瑚樹林日杲杲。又嘗舉風旛話。乃曰。風旛動處。著得箇眼。卽是上座。風旛動處。失卻箇眼。卽是風旛。其或未然。不是風旛。不是心。衲僧徒自強錘鍼。巖房雨過。昏烟淨。臥聽涼風生竹林。七年秋。退歸雪竇。十年冬。十一月二十九日。中夜沐浴而逝。塔於明覺之左。於是普陀風範。與天童並峙。

舊志高僧傳四集。

按舊志自得後有繼以弁至大繼恩求雪屋垣堂遽庵還庵鑑庵小庵十人均不詳其事實茲將其名列于住持表內凡後之無事實者概歸住持表內俱不另錄。

閒雲名德韶佛照光嗣也嘉定閒來主是山言於朝賜錢萬緡修飾殿宇殿成御書圓通寶殿及大士橋以賜韶創龍章閣藏焉舊志

大川名普濟明州奉化張氏子淳熙十六年無用淨全禪師大慧宗杲嗣開法狼山移錫

蘇之承天宣城廣教建業保寧適天童虛席迎全主之濟首謁全全舉有句無句

如藤倚樹濟云斬釘截鐵全云滄山呵呵大笑響濟云寸釘寸木全深契之又往

越之能仁見浙翁琰浙翁名如琰台州周氏子主臨安徑山參隨久及琰移鍾阜拉濟偕行又被旨

移天童職濟知藏嘉定十年三月妙勝虛席濟應其請瓣香爲浙翁記所證也元

初爲靈隱住持嘗題世尊出山相龍章鳳質出王宮肘露衣穿下雪峯智願必空

諸有界不知諸有幾時空取道原傳燈錄楊李等續錄芟繁就簡總彙成書名曰

五燈會元。賜入大藏。清著錄四庫全書中。

舊志：張立廉寶積錄序。徐增靈隱寺志。鄞縣志。天童續志。

夢窗名嗣清。山陰于氏子。肄業郡之天章上堂。德山入門便棒。臨濟入門便喝。逼龜成兆。終不能靈。寶陀者裏寂然不動。感而遂通。馬無千里。漫追風。

舊志

元

玠禪師。氏族法系俱無考。明宋濂撰淨慈孤峯德公塔銘云。孤峯族姓朱。世家明之昌國。父有成。母黃氏。父與補怛洛迦僧玠公交。玠聞雞聲入道。凡說法必鼓翅爲鷄號。玠亡已久。黃夢玠來託宿。覺而有娠。歷十四月而生。據此。孤峯卽玠後身也。

舊志

按宋濂所撰孤峯德公塔銘云。孤峯之父與普陀玠禪師善。及玠亡已久。其母夢玠來求寄宿。遂有娠。歷十四月方生。至明洪武五年圓寂。壽七十九歲。則孤峯生時。乃元世祖三十一年。若依宋統全亡之己卯起。方稱元統。則爲世祖十六年。而玠之亡。當又在前。向來山志及列祖錄。皆載于明初大千之後。失考之

甚。

東巖名淨日。南康都昌廖氏子。幼喜誦佛書。解大義。常食蔬果以自持。年十五出家。明年祝髮於廬山香林。爲天童西巖了惠法嗣。宋景定閒。主圓通。咸淳閒。兼領東林。元至元十二年。主育王。大德四年。主天童。時年已八十矣。行峻潔以完。遐邇嚮慕。越八年。爲至大元年。將示寂。書韻語以示其徒曰。天爲蓋兮地爲函。吾奚爲兮塔與庵。灰吾骨兮山阿。言已矢兮勿鑱。越三日。沐浴端坐而逝。年八十八。塔於天童西巖。平石如砥。爲其嗣法弟子。

鄞縣志引袁桷撰塔銘。德介天童寺志及續志。

如智。嘗與王積翁二奉璽書。通好日本。咸以中途有阻而還。至元十四年。捐衣鉢餘資。於沈家門側。建接待寺。以便往來者之宿頓。

舊志大德昌國志定海廳志元史。

東洲永與元叟端虛谷陵東嶼海晦機熙竹閣眞爲莫逆交。

靈隱寺志

按元叟爲元初僧。東洲既與之交。應亦爲同時僧侶。而舊志屬於宋代。蓋以一人歷兩朝耳。舊志又注云。松源岳下石林鞏嗣。考松源名崇岳。宋隆興時人生。

於處州龍泉之松源吳氏。因以自號。見陸游塔銘。石林住淨慈寺。元叟至。處以記室。見靈隱寺志。

一山寧道行素高。大德三年。奉詔出使日本。成先帝惇好息民之意。一山齋詔往而

日本不至。

定海應志。

如律。大德閒。修聖像。同如智上玉質瑞相。留供大內。賜田二十頃。命翰林院劉賡爲

文勒石記之。

舊志。劉賡寶陀寺記。

孚中。名懷信。明州奉化姜姓子。父某。爲某縣校官。母劉氏。夢拾吞大星而孕。稍長。受三經於戴表元。年十五離家。從法華院僧子思。執童子役。已而祝髮爲大僧。受具戒於鄞五臺寺。聞延慶半巖全公。宏三觀十乘之旨。與遊。久之。歎曰。教相繁多。浩如煙海。若欲窮之。徒自困耳。往參天童景德禪寺竺西坦公。大徹立旨。就維那之職。坦入滅。雲外岫繼席。命司藏鑰。文彩漸著。泰定丙寅。行宣政院。請住明之觀音寺。天曆己巳。遷住普陀。不以位望之崇。效他山飾車輿。盛徒御以炫人。自持一鉢。

丐食吳楚閒。鎮南王具香花迎至府中。虛心問道。宣讓王亦遣使奉栴檀香。紫伽黎衣。請示法要。信隨性質而導之。姑蘇產奇石。信購善工。造多寶佛塔上三層。太即

子塔載歸普陀。俾信心者禮焉。駙馬都尉高麗王繹而吉尼丞相撒敦。以信行上聞。

賜號廣慧妙悟智寶宏教禪師。及金襴法衣。居普陀十四載。後主金陵龍翔寺。當明兵下金陵。僧徒散處。信宴坐。目不四顧。執兵者皆擲杖而拜。太祖嘗親幸聽法。改龍翔爲大天界寺。信賦性冲澹。歡溢眉宇。日默誦法華經七卷。雖流金折膠。不爲閒。臨終前一日。太祖在江陰夢見信。問曰。師來何爲。曰。將西歸告別耳。還聞遷化與夢符。詔出金幣助其喪。舉龕之夕。太祖親致奠。寵榮之加。無與並者。塔遺骨於金陵牛首山。分瘞髮爪於天童。有五會語錄行世。法嗣雙林致凱等。十有九人。

舊志。宋濂撰塔銘。德介天童寺志。鄞縣志。

古鼎名祖銘。奉化應氏子。初從金峨寺僧橫山錫。薙染學出世法。年纔十八。元叟端住靈隱。銘往參。一日入室。叩黃龍見慈明因緣。端詰曰。卽如趙州道臺山婆子。被

我勘破。慈明笑曰。是罵耶。你且道。二老漢用處。是同是別。銘曰。一對無孔鐵鎚。端曰。黃龍直下悟去。又如何。銘曰。也是病眼見空華。端曰。是不是。銘擬進語。端便喝。銘當下廓然。卽命居記室。自是聲譽頓發。與夢堂。噩。楚石。琦。並稱諸方之崢嶸者。後居鄞東湖青山寺。建鍾秀閣。劉仁本題其書樓云。青山湖上老僧居。百尺危樓萬卷書。架插牙籤朝旭上。香消古鼎夜窗虛。闌干竹色浮蝌蚪。枕簟芸香落蠹魚。近憶校讎人未遠。雨花零亂獨躊躇。至正七年丁亥。住徑山。賜號慧性文敏宏覺普濟禪師。十八年戊戌。將遷寂。書偈曰。生死純真。太虛純滿。七十九年。搖籃繩斷。擲筆而逝。茶毘。舌根數珠皆不壞。舍利無算。於徑山。隆教寶陀。皆建塔焉。銘洞徹玄微。踔厲縱橫。袁桷。黃潛。虞集。歐陽玄。皆稱慕之。危素爲撰塔銘。有四會語錄。宋濂爲作序贊。著有冷泉聽猿賦。洋洋五百餘言。詳載續修雲林志。鄞萬壽寺住持天淵。靈隱住持可純。皆其入室弟子。天淵名清濬。銘寂後。亦主青山。明洪武四年召見。勞問甚至。

舊志鄞縣志靈隱寺志雲林寺志明林時對重興金峨寺記。

按夢堂名曇噩。慈谿王氏子。世儒業。生而洞爽。幼通經史。祝髮東皋寺。文章古
潔。士大夫尊禮之。明洪武四年。詔通三藏高僧。問鬼神情狀。師與楚石琦。行中
仁等。應召至。館於天界寺。著書上奏。六年歸寂。壽八十有九。未出家前。嘗學文
於金華胡翰。其後烏斯道讀書東皋。又從噩學文。著有梁唐宋高僧傳。楚石名
梵琦。象山人。襦襦中有神僧摩其頂曰。此佛日也。因名之爲曇曜。元泰定中。住
海寧福臻院。明初徵至京。建法會。親承顧問。賜衣鉢。著有北遊鳳山。西齋等集。
及六會語錄。卒。宋濂撰塔銘。以上俱見象山志。錄之。益見古鼎之爲名山龍象
矣。

大千名慧照。永嘉麻氏子。年十五。往依縣之瑞光院了定。即照從兄長老良公。知爲法器。

卽雍落爲弟子。踰年稟持犯於處之天寧。首謁晦機熙。晦機名元熙。豫章唐氏子。於杭之淨慈。

未契圓證。一日閱眞淨語。至頭陀石擲筆峯處。默識懸解。汗流浹背。時東嶼海以
石林輩逝世。提倡蘇之薦嚴。照杖錫往謁。東嶼知其有夙悟。遂留執侍左右。後主

藏室於郡之萬壽。復應杭之淨慈。溫之江心。分座之招。天曆戊辰。出世樂清之明慶。集衆誨曰。佛法欲得現前。莫存知解。縛禪看教。未免皆爲障礙。何如一物不立。而起居自在乎。德山之棒。臨濟之喝。亦有甚不得已爾。聞者悅懌而去。至正十五年乙未。遷主普陀。先是寺以構訟而廢。照以訟興在乎辨難太迫。處之以寬柔。絕勿與校。且曰。我佛得無諍三昧。所以超出羣品。我爲佛子。可不遵其教耶。衆皆服化。未幾。遷主育王。憫大法陵夷。孜孜誘掖。不遺餘力。嘗垂三關語。以驗參學。一曰。山中猛虎。以肉爲命。何以不食其子。二曰。虛空無向背。何以有南北東西。三曰。飲乳等四大海水。積骨如毘富羅山。何者是汝最初父母。此三關。最爲峻切。鮮有契其機者。居九年。退於妙喜泉上。築室曰夢庵。因自號夢世叟。掩關獨處。凝塵滿席。不顧也。洪武癸丑十月。書偈化滅。僧臘七十。世壽八十五。塔於夢庵之後。有語錄若干卷行世。

舊志宋濂撰塔銘。

明

大基名行丕。鄞人。早得法於左庵良公。掌天童內記。宗說兼通。行解相應。蔚爲時之名僧。元至正二十四年。江浙行省丞相康里公。領宣政院事。選丕主天童佛隴寺。洪武初。由佛隴來主普陀。匡衆說法。恢復產業。建清淨境亭於寶陀寺之南嶺上。

舊志。宋謙佛隴寺記。清淨境亭銘。德介天童寺志。

祖芳名道聯。鄞陸氏子。年十四。禮崑山薦嚴得度。稟戒於鄞之五臺。後出世台之廣孝。遷紫籙。及麻峪景山。明之普陀。越之能仁。末主淨慈。其主普陀也。人比之爲宋真歇元孚中。蜀王賜衲衣鉢。孟永樂丙戌。徵爲釋教總裁。有拙逸語錄行世。舊志

淡齋正德十年住持。其徒大揚州。小揚州。募緣留都十載。鑄鐵瓦二萬。鐵甎一萬。構

殿潮音洞。舊志

普賢名道誠。徽州人。以戒德聞。歷遊名山。至普陀。師淡齋。參禮甚衆。年七十有三。預報示寂。有偈云。普賢普賢。苦行心堅。卽心是佛。西方目前。清十二世孫通旭題其像曰。猗歟我祖。祥發梅岑。廣修萬行。名實相應。謂是華嚴長子。卻來補洛中興。謂

是普眼莫覩。狼藉滿地兒孫。燈輝古鼎。棒喝雷鳴。臨行一句。耀古騰今。千流萬派。皆歸海。燦破乾坤月一輪。塔在龍灣。舊志

本空名圓獻。餘姚人。嘉靖閒。卓錫普陀。精修戒定。悟空五蘊。遐邇嚮化。適遭倭變。朋徒西竄。遄歸姚江。玉皇殿聚徒熏修。隆慶閒。總督劉公。迎回山中。避居西天門之圓通庵。焚修益虔。講誦不倦。遠近聞風者。莫不奉爲金仙尸之祝之。塔在西天門左。舊志。照機重修宗譜序。

無瑕名明通。本空獻徒。修德勵行。壽登百齡。受徒十人。皆英賢鉅略。增重名山。奇峯尤其傑出者。別爲傳。塔在達摩峯下。通旭百歲老祖宗譜序。

真松嘉靖閒。來自五臺龍樹寺。禮部下郡縣。給札住持。修復寶陀寺。大倡宗風。復興勝果。舊志。汪鏜重修寺記。

一乘名真表。翁洲人。年十二入山祝髮。師明增。及壯誓志興復。重創殿宇。如天王殿。雲會堂等。萬曆六年爲住持。十四年。敕頒藏經到山。并賜金環紫袈裟。詣闕謝恩。

賜延壽寺茶飯香金五十兩。緇衣禪帽各一件而還。性剛直。有戒行。敬禮十方賢。衲結庵五十三處。以故名僧皆歸之。大智至山。創建叢林。得表贊揚之力爲多。塔在千步沙西資庵前。

舊志魯王
普陀碑記。

聊城傅光宅贈詩。海山深處有高僧。妙法曾參第一乘。方寸自能清似水。浮雲底事愛還憎。

雲峯名真宰。仁和人。萬曆閒。寺燬於火。同寂庵竭力興建。萬曆二十六年爲住持。

舊志。

屠隆普陀
寺募緣疏。

寂庵名如迴。蘭谿人。投眞學爲師。長受戒於金山和尚。聽法於萬松法師。歸山閱藏。諷華嚴者十有三載。萬曆二十九年三月。因眞宰沒於京。衆舉於郡邑爲住持。值敕造內使絡繹朝夕。拮据公務。三十二年冬。退居東堂。踰年夏。督造至。復授爲住持。居東方丈。鼎新山寺。三十五年春。賜紫袈裟一襲。九月二十五日。進謝恩表。十月十五日。欽命賜紫。并給禮部札。付授僧錄司右善世而還。周應賓賦詩爲贈。塔

在梅岑庵之左。舊志

普光名眞遇。翁洲人。性質樸。值如迴讓住持。衆以其誠。遂共推之。屠玉衡贈詩云。優

曇花發定中。香衣裏明珠。是密藏。黃葉止啼。都不著。悟來本地好風光。舊志

奇峯名眞才。秀水人。髫年入道。受法於無瑕老人。賦性溫雅。才德兼備。爲堂頭首領。

善調大衆。吏部蔣公贈額曰。叢林調御。名聞廣著。司府給冠帶。爲東方丈住持。姜

應麟都諫題像贊云。謂像眞耶。本來是空。謂像假耶。儼乎其容。旣文旣慧。允穆允

恭。住持方丈。紫衣是榮。晚年精爽。詩詞益工。澄心而坐。瞑目而終。合山大德。罔不

信從。故咸禮其像而尊敬之。曰。者老和尚。海上奇峯塔在龍灣。舊志

遜吾名如讓。嚴州人。敕建寺宇。往返京都。不辭勞苦。萬曆三十七年。奉禮部札。授僧

錄司右闡教。協理寺事。三十八年告竣。復命賜紫衣一襲。臨海王立程贈詩。有開

山初出定。狎海久忘機之句。舊志

三藏名眞經。翁洲人。秉性沈默。舉措無苟。督造張公隨。以師禮事之。萬曆三十九年。